

nicht haben kan / mus man sonst durch zeichen vnd farbe  
den menschen schätzen vñ mit vleis merckung thun / ob die  
Kranckheit aus hitze odder Kälte zc. Komt / vñ widder solche  
hitze / Küle erzney bereyten zc. Sonderlich vor allen dingen  
ist auch nott / das solche erzney zu bequemen zeiten zu  
gericht werden / auch zu bequemer zeit gereycht vnd gege-  
ben werden / vnd sonderlich nach dem lauff des Mondes /  
durch die .12. hymliche zeichen / auch durch die .28. mansio-  
nes des Mondes / wie du denn solche ynn dieser nachfol-  
genden Tafeln finden wirst.

Vnd darumb / so man ein cörper des menschen / einfü-  
ren odder zuziehen wil feuchtunge / sol man yhn solche erz-  
ney eingeben / odder aussen auff legen / so der Monde ist yn  
ein feuchten zeichen / odder feuchten mansion / so anders  
der Kranck der zeit erwarten kan / Auch so man ein erzney  
zubereyten wil / den cörper zubefeuchten / sol auch zugerich-  
t werden zu solcher zeit. Also auch / so man dem cörper  
wil trücknen / oder zu solchem trücknen erzney zubereyten /  
sol man thun / so der Monde ist ynn trucken zeichen odder  
mansion. So aber die cörper behalten sollen werden ynn  
gesundheit / durch erzney / sollen solche erzney zubereytet /  
auch eingegeben werden / so der Monde ist yn den zeichen  
odder mansion die das mittel halten / das ist / die da nicht  
einfließen zur truckne odder zur fechtung / vnd sonderlich  
sol man sich hüten für der dritten / sechzehenden / achtzehen-  
den vnd sechsundzwenzigsten mansionen. Solchs aber  
zu wissen / ynn was mansion der Monde teglich sey /  
wirstu hie bey diesem nachfolgenden Tefelein ein vnterrich-  
t haben / mit exempel / dich darnach zu richten. Der-  
halben lieber bruder / Nym dis kleine büchlein von mir /  
mit vleis versamlet / ynn freuntlicher brüderlicher liebe an /  
vnd wo ich denn vernym / das dir solchs gefallen wird / wil  
ich dir viel mehr anders größers auch zueygnen vnd zu-  
senden. Bitt wöllest mich dir allzeit befohlen lassen sein.  
Geben Anno 1528. zu Nürnberg.

Zu finden